

Proklamasie 2018

CV de Braniemeekers



Leef Vastelaovesvrin,

De keersbaom hóbbe veer nog mer zjus aon de kant,
 Of iech staon hij al gestieveld en gespaord mèt de scepter in mien hand.
 'T heet miech allemaol vööl ste lang gedoord,
 Es iech trök kiek naor 't momint boe op iech gevraog woord.
 Iech deenk dat 't veur vööl lui 'n groete verrassing zal zien tot iech hei staon,
 Iech belaoef uuch tot iech d'r same mèt uuch vol veur gaon.

Veur tot veer dao mèt goon beginne wèl iech iers 'ns eve mèt uuch kieke,
 Wat d'r gaonde is en wie 't d'r veur steit in us wieke.
 De studente bringe in Lummel en Nazareth altied hiel get tweeg,
 Hopelek stoon zie door 't Buurtprotocol binnekort weer in 'n beter daagleech.
 Same liere, werke en woene in dees sjoen buurt,
 Mèt 'n bitteke rekensjap en respek, veur eederein, dat is zoe wie 't ziech huurt.

De voetbalclub is noe definitief ter ziele,
 Wat euver bleif zien allein nog mèr braak ligkende perciele.
 In 1946 woort RKVCL in Lummel geboore,
 Door de waterbuffers is sport en spel nao 71 jaor veur good verlore.
 'T verenigingsleve in Lummel heet alweer 'n jeske oetgedoon,
 Op dees meneer laote ze weer 'n sjoen club naor de kloete goon.

De Hoolhoes planne weure obbenuits vaan stal gehaald,
 Alle inzat vaan de Buurtraod heet ziech hei mèt weer oetbetaald.
 Hoezer, apparteminte en winkels goon ze bouwe,
 Dat gief de lui in us twie wieke weer hiel vööl vertrouwe.
 De nuibouw moot de twie wieke mèt ein verbinde,
 Laote veer hope tot ouch weer hiel gèt Lummelere de weeg trök weite te vinde!

Door de vergrijzing kump in Nazareth neet mie vööl vaan de grond,
 Meh hopelek weurt de buurt door de rinnevasies weer gans gezond.
 Mier woeninge veur jong gezinne moote d'r goon koume,
 Boedor veer weer keender in straote en op pleine goon tegekoume.
 De lui hóbbe dao noe al lang genóg op gewach,
 Nog evekes daan steit Nazareth weer trök in häör krach.

Leef lui, iech deenk tot iech veur venaovend mer 'ns oetsjeie gaon,
 'T is noe d'n hoegste tied veur 't fies vaan de lach en de traon.
 Op de muzikale klanke vaan "Gewoen e vastelaovendsleedsje",
 Goon veer tappe oet e gans aander veetsje.
 Iech nudeg uuch allemaol vaan harte oet,
 Kom mèt miech mèt in eine groete rijaloet!

Gegeve te Lummel, 14 jannewarie 2018, door:

Computerfanaticus, Bowlingexpèrticus, Ripperatoricus



Roy le

